



**Piffissaq piniarfiusoq tamaat isigalugu nalunaarutip aalajangersagaasa iluini, umimmannik ukiukkut piniarneq, taamaaliornermi assersuutigalugu Naternami pisassiissutit ukiakktu pisarineqanngitsoortut ukiukktu iluaqutigineqarsinnaasunngorlugit pinissaat, qulakkeeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Kristian Jeremiassen, Inuit Ataqtigiit)

## **Siullermeenera**

Siunnersuuteqartoq Kristian Jeremiassen, Inuit Ataqtigiit, piffissaq piniarfiusoq tamaat isigalugu nalunaarutip aalajangersagaasa iluini, umimmannik ukiukktu piniarneq, taamaaliornermi assersuutigalugu Naternami pisassiissutit ukiakktu pisarineqanngitsoortut ukiukktu iluaqutigineqarsinnaasunngorlugit pinissaat, qulakkeeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuutaanut Naleqqamiit qutsavigerusupparput.

Siunnersuut Naleqqamiit aamma eqqartuiffigisarnikooqaarput Qeqertarsuup eqqaa kisimi pinngikkaluarlugu, taamaammat Naleqqamiit uggorilaarparput nunarput tamaat isigalugu siunnersuut imaqqanngimmat uanimi toqqammavilersuutigineqarmat neqissaqarniarnikkut iluaqutaasussat tapersorsorluinnagarput periarfissinniarneqarmat, tassalu umimmaqarfiusoq Naternaq siunnersuuteqartup uani pimmagu ukiakktu pisarinnngitsuukkat ukiuunerani piniarneqarsinnaanerit eqqarsaatigalugu periarfisseerusunnera Naleqqamiit tamakkiisumik tapersorsoratigu oqaatigissavarput.

Ivittuut eqqaani ukiuunerani umimmanniarfigineqartarnissaa nalilersorniarneqartartunut ilaanikuuvortaaq, tassanilu kisitsisoqarsimannginnera aammalu umimmaqassusaa qulakkeerneqarsimannginnera toqqammavilersuutigalugu ukiuunerani umimmanniarsinnaaneq periarfissaqanngitsoq toqqammavilersuutaasarsimapput. Taamatullu Sigguk eqqarsaatigalugu ukiuunerani umimmanniarsinnaaneq periarfissaqartinneqanngilaq, taamaammat Naleqqamiit manna



iluatsillugu Naalackersuisut Ivittuuni taamatullu Siggummi ukiuunerani umimmanniarsinnaanerup periarfissaqalersinnaanera eqqarsaatigalugu qulaajaanerit ingerlatseriarlugit ukiukkut taakkunani umimmanniarsinnaanerup ilanngullugu periarfissarsiornissaa Naleqqamiit kissaatigalutigu manna periarfissaq atorlugu angusserusuppugut, taakkulu sumiiffiit ilanngullugit ataatsimiititaliami pilersaarusiortoqarlunilu periarfissarsiornissaa pillugu suliaqartoqarnissaa Naleqqamiit kaammattuutigalutigu. Ivittuut eqqarsaatigalugu nunatta kujataaniittut pisassinneqartalernissaat piffissanngunnginnerseq ilanngullugu Naleqqamiit nalilersoqqarput. Kalaallit Nunatta kujataaniittut aamma neqissaqarnikkut iluaqutigiinnarnagu aamma nunatsinni allatuulli periarfissinneqarnissaat piffissanngorsorinartoq Naleqqamiit isumaqaratta. Kujataarmiut nunatsinni arlaatigut sumiginnagaallutillusooq qaanngiinnarneqartarnerat Naleqqamiit pissusissamisuunngitsutut isigigatsigu neriuppugut tamanna ilanngullugu nalilersuilluartoqassasoq.

Sigguk eqqarsaatigalugu qimussimik ukiuunerani umimmanniarsinnaaneq eqqarsaatigalugu periarfissarsiortariaqarnera Naleqqamiit pingaartutut isigaarput, tassa qimmeqarneq eqqarsaatigalugu kulturikkut eriagisariaqarlunartut ilaat taamaliornikkut aamma nukittorsaaffigineqartussaanaera eqqarsaatigalugu Naalackersuisunut kaammattuinerput neriutigaarput tusaaneqassasoq. Tamannalu pillugu Naalackersuisooq sumiiffinni taakkunani umimmanniarsinnaasut tusarniaaffigissagai ilanngullugu ingerlatissagaa kaammattuutigerusupparput.

Taamatut periarfissarsiuussineq aamma kulturikkut pingaartitatta ilagilluinnagaat qimussimik piniarneq ingerlanneqarlunilu piuarnissaa aqutissiuunneqassamat Naleqqamiit neriutigaarput ilanngullugu tamanna aqutissiuunneqassasoq.

Sisimiormiut ukiuunerani umimanniartarnerat ilanngullugu nalilersuiffigeqqittariaqartoq Naleqqamiit isumaqarpugut, tassani misilittagarilikkat maannamut naleqqussaaffigeqqissagartassai susassaartut sumiiffimmi suleqatigalugit nalilersuillunilu aaqqiissutissartai aaqqiiffigalugit. Sisimiormiut ukiuunerani umimmanniartarnermut misilittagaqarluartuupput, taamaamat taakku ilanngullugit suleqatigalugillu aaqqiissuteqarnissamat peqataatinneqartariaqartut Naleqqamiit isuamaqarpugut.



Aqutsivik immikkoortua Maniitsoq 2021-imi ukiuunerani ullunut qulinut umimmanniartoqarsinnaanera akuersissutiginerani toqqammavilersuutigineqartut ilagaat biologit siunnersuinerat umimmaat sivikinnerpaamik ukiuunerani piniarneqarnissaanut toqqammavilersuutigalugu umimmaat uninngaartarfiat sivisuallaamik nipiliorfigineqarlunilu piniarfigineqartarneranni siammassisorujussuarmik inissisimalersimasut, taamaasilluni angallatinik motorilinnik nipiliortarneq annikinnerpaaffimminiinnissaa toqqammavilersuutigisimagaat ullunut quliinnarnut ukiuunerani piniartoqartarnissaanut, tamanna ilanngullugu Naalackersuisunut ataavartumik susassaqartut piniartartullu peqatigalugit Kattuffiat aqutigalugu nalilersorlugulu naleqqussaaffiguarnissaa.

Nunarput tamaat assigiiaartumik Naalackersuinikkut sullittusnaanera tunaartaralugu taamatut sumiiffiit assigiinngitsut pillugit eqqumaffigineqartariaqartut ukiuunerani neqissaqarniarnikkut kulturitsinnilu inerisaassutaasinnaasut ilanngullugit periarfissaq manna ilanngullugu angussaqaarpugut neriutigaarput taakku ilanngullugit ataatsimiititaliami nalilersorluarneqarumaartut aamma kaammattuutigut Naalackersuisuniit tusaaneqarlutik qanoq iliuuseqarfiginissaanut suliaqarumaartut

Taamtut oqaaseqarluta piffissaq piniarfiusoq tamaat isigalugu nalunaarutip alaiangersagaasa iluini, umimmannik ukiukkut piniarneq Naternami pisassiissutit ukiakkut pisarineqanngitsoortut ukiukkut iluaqutigineqarsinnaanngorlugit pisassiissutigisalnissaanut tapersiilluta Naleqamiit ataatsimiititaliami susassaqartumi ilanngussagut ilanngullugit suliarineqarnissaanut innersuussivugut.